

Na temelju članka 29. stavak 6. Zakona o zaštiti životinja od zaraznih bolesti koje ugrožavaju cijelu zemlju ("Službeni list RBiH", br. 2/92 i 13/94), a koji se sukladno sa člankom IX.5.(1) Ustava Federacije Bosne i Hercegovine primjenjuje kao federalni propis, federalni ministar poljoprivrede, vodoprivrede i šumarstva, donosi

PRAVILNIK

O UVJETIMA KARANTINA ZA UVEZENE ŽIVOTINJE

Članak 1.

Ovim pravilnikom propisuju se uvjeti i trajanje karantina za uvezene pošiljke životinja, sjemena za vještačko osjemenjivanje životinja, oplodjenih jajnih stanica za oplodjavanje životinja i jaja za rasplod iz uvoza (u daljnjem tekstu: pošiljke).

Članak 2.

Pod karantinom, sukladno ovim pravilnikom, podrazumijeva se prostorija, prostor ili skup prostorija u kojima se drže pošiljke, pod uvjetima potpune izolacije, a radi provjere i zvaničnog utvrđivanja njihove zdravstvene ispravnosti.

Članak 3.

Otvaranje karantina pošiljaka iz uvoza vrši se na osnovu pismenog zahtjeva uvoznika.

Zahtjev sadrži: firmu, odnosno naziv uvoznika i korisnika pošiljke, broj, vrstu, spol i pasminu životinja, zemlju i mjesto porijekla pošiljke, te područje općine i firmu u kojoj se namjerava izvršiti karantin.

Uz zahtjev za otvaranje karantina prilaže se odgovarajući dokazi o uvozu pošiljke.

Zahtjev za otvaranje karantina podnosi se Federalnom ministarstvu poljoprivrede, vodoprivrede i šumarstva - Sektor za veterinarstvo (u daljnjem tekstu:Ministarstvo).

Članak 4.

Otvaranje karantina može se odobriti ako objekat za karantin životinja ima odgovarajuće uvjete za smještaj, držanje i ishranu životinja i potreban broj radnika, ako su najkasnije 48 sati prije smještaja životinja izvršeni: mehaničko čišćenje i dezinfekcija objekta, ako je u objektu obezbijedena prostorija za porođaj i prihvata podmlatka, ukoliko se vrši karantin bređenih životinja i odvojena prostorija za smještaj eventualno oboljelih, odnosno za izolaciju pozitivnih i sumnjivih reaktora, ako je objekat ograđen i ako postoji jedinstven ulaz obezbijedjen dezinfekcionim barijerama za pješke i vozila. Na ulazu mora biti tabla sa natpisom "KARANTIN-ULAZ ZABRANJEN".

Karantin životinja ne može se izvršiti u objektima koji se nalaze na području distrikta ili stacionarnog pojavljivanja zaraznih bolesti životinja ili u čijoj se neposrednoj blizini nalaze životinje iste vrste ili životinje koje su prijemčive na zarazne bolesti koje se mogu prenijeti sa uvezenih životinja.

Članak 5.

Karantin pojedinih vrsta životinja iz uvoza ne može se izvršiti u objektima na području općine na kome su utvrđeni slučajevi zaraznih bolesti životinja i to:

1. koptara (konji, mazge, magarci i mule) ako su u posljednjoj godini utvrđeni slučajevi sakagije, durine i infektivne anemije konja;

2. goveda i bivola, ako su u posljednja tri mjeseca utvrđeni slučajevi bruceloze, a u ekonomskom dvorištu i tuberkuloze goveda;
3. ovaca, ako su u posljednjoj godini utvrđeni slučajevi melitokokoze i ovčijih boginja, odnosno u ekonomskom dvorištu u posljednja tri mjeseca slučajevi kuge ovaca i zarazne epavosti ovaca;
4. svinja, ako su u posljednjih šest mjeseci utvrđeni slučajevi zarazne uzetosti svinja i bruceloze svinja, u posljednjih 40 dana slučajevi klasične kuge svinja, odnosno u ekonomskom dvorištu u posljednja tri mjeseca slučajevi leptospiroze;
5. peradi (kokoš, ćurke, guske, patke i druga domaća perad) i ukrasnih i egzotičnih ptica ako su u posljednja tri mjeseca utvrđeni slučajevi njukastlske bolesti, a u ekonomskom dvorištu ili naselju slučajevi boginja peradi, tuberkuloze peradi i kokošijeg tifa;
6. ukrasnih i egzotičnih životinja, pasa, mačaka, pčela, kunića, svilenih buba, riba, rakova, koljki, ježeva, kornjača, puževa, šaba, pijavica, divljači, zvijeri i laboratorijskih životinja, ako su u posljednja tri mjeseca utvrđeni slučajevi oboljenja koja se prenose uvezenim vrstama životinja.

Članak 6.

Ministarstvo rješenjem određuje mjesto, trajanje karantina, dijagnostička ispitivanja koja će se izvršiti u karantinu i druge uvjete karantina, po prethodno pribavljenom mišljenju općinske, odnosno kantonalne veterinarske inspekcije u uvjetima iz članka 4. ovog pravilnika.

Rješenjem iz stavka 1. ovog članka određuje se i veterinarska stanica ili veterinarska služba poduzeća koja će vršiti zdravstvenu zaštitu i uzimanje i slanje dijagnostičkog materijala (krv, sekreti, ekskreti i drugi dijagnostički materijal) i veterinarska specijalistička organizacija koja će izvršiti dijagnostička ispitivanja u karantinu.

Veterinarska stanica, veterinarska služba poduzeća i veterinarska specijalistička organizacija dužne su o nalazima obavještavati uvoznike, općinsku odnosno kantonalnu veterinarsku inspekciju i Ministarstvo.

Članak 7.

Nadzor nad izvršavanjem mjera određenih rješenjem iz članka 6. ovog pravilnika vrši općinska odnosno kantonalna veterinarska inspekcija.

Članak 8.

Uvoznik je dužan da o uvozu pošiljke obavijesti općinsku odnosno kantonalnu veterinarsku inspekciju najkasnije 24 sata prije prispjeća pošiljke u karantinske prostorije, a općinska odnosno kantonalna veterinarska inspekcija dužna je da o tome odmah obavijesti Ministarstvo i rješenjem određenu veterinarsku specijalističku organizaciju, veterinarsku stanicu, odnosno veterinarsku službu proizvođača.

Članak 9.

Po isteku vremena trajanja karantina Ministarstvo donosi rješenje o prestanku (zatvaranju) karantina, po prethodno pribavljenom mišljenju općinske odnosno kantonalne veterinarske inspekcije.

Članak 10.

Karantinski objekat za uvezene kopitare, goveda, bivole, ovce, koze, svinje i perad, u pogledu izgradnje, mora ispunjavati slijedeće uvjete:

1. mjesto na kome se nalazi karantinski objekat mora biti fizički dovoljno udaljeno od naselja i drugih stočarskih objekata, kafilerija i jama grobnica, a nivo podzemnih voda na mjestu izgradnje mora biti najmanje dva metra ispod površine;

2. krug oko karantinskog objekta mora biti dovoljno prostran da bi se obezbijedila funkcionalna povezanost pojedinih dijelova i ograđen ogradom visokom najmanje dva metra;
3. karantin mora biti obezbijeđen potrebnim vrstama i količinama hrane za životinje;
4. karantinski objekat mora biti snabdjeven dovoljnim količinama pitke vode i sistemom za prihvatanje i epizootiološki bezbjedno odvođenje otpadnih i atmosferskih voda;
5. dubrište karantinskog objekta mora biti udaljeno najmanje 50 m od karantinskog objekta i izgrađeno tako da je nemoguće zagađivanje okoline i raznošenje bioloških agensa;
6. karantinski objekat ne smije biti smješten u krugu u kome se nalaze druge životinje iste vrste, odnosno životinje na koje se može (uzajamno) prenositi bilo koja zarazna bolest;
7. karantinski objekat mora udovoljavati standardnim normativima higijene, smještaja i držanja za svaku vrstu životinja.

Članak 11.

Karantinski objekat za uvezene kopitare, goveda, ovce, koze, svinje i perad, u pogledu tehničkih uvjeta i opreme, mora ispunjavati slijedeće uvjete:

1. mora biti izgrađen od čvrstog materijala i odgovarati tehnološkim uvjetima za uzgoj određene vrste životinja;
2. mora imati samo jedan ulaz, preko koga se kontroliše kretanje ljudi i životinja i promet hrane za životinje i drugog materijala;
3. ulaz u krug karantinskog objekta i ulaz u karantinski objekat moraju biti obezbijeđeni dezinfekcionom barijerom za vozila i osoblje i punktom sa opremom za dezinfekciju obuće, odjeće i ličnu dezinfekciju radnika;
4. karantinski objekat mora raspolagati odgovarajućim prostorijama i opremom za presvlačenje i kupanje radnika, dovoljnim brojem i vrstama zaštitne odjeće i obuće;
5. karantinski objekat mora raspolagati uređenim mjestom za dezinfekciju vozila kojima se u karantin dovoze životinje iz uvoza i hrana za životinje u karantinu.

Članak 12.

Karantinski objekat za uvezene ukrasne i egzotične ptice i životinje, ptice, pse, mačke, pčele, kuniće, svilene bube, ribe, rakove, koljke, ječeve, kornjače, pučeve, abe, pijavice, divljač, zvijeri i laboratorijske životinje mora biti građen i smješten tako da obezbjeđuje zadovoljavajuće tehnološke i veterinarsko-sanitarne uvjete za uzgoj tih životinjskih vrsta.

Članak 13.

Karantinski objekat mora biti pripremljen za prijem pošiljke iz uvoza najmanje 14 dana prije njenog prispjeća u karantin.

Članak 14.

Za vrijeme trajanja karantina ulaz u karantinski krug zabranjen je svim licima koja nisu zaposlena u karantinu, izuzev veterinarskih inpektora, stručnjaka veterinarskih stanica, veterinarskih službi i veterinarskih specijalističkih organizacija koji su određeni rješenjem Ministarstva da u karantinu sprovode epizootiološka, klinička, laboratorijska i druga ispitivanja i poslove zaštite zdravlja životinja.

Članak 15.

Karantin za uvezene kopitare (konji, mazge, magarci i mule), papkare (goveda, bivoli, ovce, koze i svinje) i krupne divlje životinje traje 30 dana.

Karantin za perad (kokoši, ćurke, guske, patke i druga domaća perad), ukrasne i egzotične ptice i životinje, pse, mačke, kuniće, pčele, svilene bube, ribe, rakove, koljke, ježeve, kornjače, puževe, abe, pijavice, sitnu divljač, male zvijeri i laboratorijske životinje traje 21 dan.

Karantin za uvezeno sjeme za vještačko osjemenjivanje životinja i oplodene jajne stanice za oplodavanje životinja traje do završetka naređenih dijagnostičkih ispitivanja, po pravilu ne duže od 14 dana.

Članak 16.

Po ukazanoj potrebi, a po prethodno pribavljenom mišljenju općinske odnosno kantonalne veterinarske inspekcije, Ministarstvo može donijeti rješenje o produženju važenja karantina za određeno vrijeme.

Karantin se može produžiti ako se preduzetim kliničkim, patoanatomskim i laboratorijskim ispitivanjem posumnja na zaraznu bolest ili dokaže zarazna bolest određena rješenjem o veterinarsko-sanitarnim uvjetima za uvoz te pošiljke.

Članak 17.

Stupanjem na snagu ovog pravilnika na teritoriji Federacije Bosne i Hercegovine prestaje primjena Pravilnika o uvjetima i trajanju karantina za uvezene životinje ("Službeni list SFRJ" broj 6/88) i odredbe čl. 8. do 15. Pravilnika o preventivnim mjerama za sprječavanje pojave i mjerama za utvrđivanje postojanja određenih zaraznih bolesti ("Službeni list SRBiH", broj 20/78).

Članak 18.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 05-24-615/99
18. listopada 1999. godine
Sarajevo

Ministar
dr. **Ahmed Smajić**, v.r.
